

د. هناء الشنواني

حوار بين الحمار حا وحفيده الجحش جا

(1)

جدو حا هو حمار عجوز، وحفيده جا جحش صغير يعيشان في حظيرة من حظائر الصعيد. ذات مرة دخل جا يلهث وارتمى في حوض جده يبكي، ويقول:

مصيبة يا جدو مصيبة! سمعت هريدي يقول لمساعد إحنا نخطف كل كام يوم حمار ونقطعه ونبيع لحمته في مطاعم القاهرة حنكسب ذهب، فجيت جري لازم يا جدو نبلغ الشرطة.

بلا تبغ بلا زفت مالناش دعوة خرينا في حالنا إنت أهم حاجة ماتخرجش لوحذك وخلاص وطالما عندك برسيمك ومية المجاري طافحة جنبنا وبتشرب عايز ايه تاني يا جحش؟؟ احمد ربنا لا النعمة تزول. لا يا جدو لازم نبلغ الشرطة وبعدين لما باسمع كلامك دايمًا مابشوفش خير، وبقيت باخاف.

طيب حنبغ الشرطة إزاي وهم مايفهموش في لغة الحمير؟ نطلع الجبل عند الشيخ همام هو بيعرف وهو يقولهم.

وعند الشيخ همام:

لا... ابعدوا عني مش عايز أنزل والناس طول الطريق بتبوس إيدي وتقول لي بركاتك ياشيخ همام! أنا لأحب هذا الشغل.

بس انت حتنقذ أرواح حمير بريئة مش خايف من ربنا؟
طيب أمري إلى الله حانزل أبلغ المرة دي على شرط ماشوفش وشكم تاني
لأن أنا عارف الحمير طلباتها لاتنتهي.

في الحظيرة:

الحمد لله ياجدو كل البلد بتصدق الشيخ همام من ساعة ماكان العمدة
مش لاقى ابنه والشيخ همام قاللهم الحمار يقول إنه وقع في حفرة كبيرة ورا
الخرابة اللي في آخر البلد، وراحوا فعلا ولاقوه، ومن ساعتها والناس
بتعامله باحترام زايد، وتبوس إيده.

جدو! أنا بافكر أقول للشيخ همام يكلم العمدة يخليني أبقي عضو في
مجلس الشعب وأنهم هناك عشان عندي كبت وعاز أطلب بحقوقى زي
حمير أوروبا.

ماتقارنش نفسك يا بني بحمير أوروبا دول حلوين أوي سمعت أن عينهم
خضرا وشعرهم أصفر شكل الأجانب اللي بيدجوا يشوفوا الآثار عندنا،
وبينهمقوا بالانجليزي، وبعدين الشيخ همام مش قاللك ماشوفش وشكم
تاني، خللي عندك كرامة يا بني.

أنا مابشحتش ياجدو أنا بطلب بحقوقى.

حقوق إيه يا جحش ؟ عيش عيشة أهلك طول عمرنا في حالنا من أيام
الفراخنة.

نظر جا إلى جده والدموع تترقق في عينيه، فقال له:
طب نام دلوقت وكمان كام يوم روحله لوحدك نهق عنده أنا مش حاروح
معاك أنا كبير في السن ومش ناقص هبلك، وبعدين محتاج في المجلس
مترجم دائم والشيخ همام معتزل.
أنا حاروح له ياجدو وأحاول أقنعه.
براحتك يا بني بس أنت مسئول عن تصرفاتك.
نهق الحمار جا من السعادة والتفاؤل ونام يحلم أحلاما سعيدة، ثم استيقظ
في الصباح على ركلة من رجل يوسف بن الحاج متولي وهو يقول له ياللا
بيننا على الغيط ياجحوش.

(2)

جدو جدو الحمد لله المحافظ وافق على دخولي البرلمان وحاكون أول حمار ينهق في البرلمان.

طيب يا بني مبروك عليك خد بالك من نفسك وخلليك متزن عشان أنا شايف الفرحة مطيرة مخك اهدا وخد بالك من كلامك ماتخليش الناس تاكل وشنا وتقول علينا بهائم. قل لي ياللا جهزت إيه ؟ ؟

أول حاجة يا جدو عايز الحمير يبقى ليها احترامها يعني السايح الأجني لما يشوف الحمار المصري يحترمه ويشعر بالهبة.

ودي ازاي يا بني ؟ ؟ يلبسوه بدله يعني ونضارة ؟

لا يا جدو لا ، أولا لما الناس تحترم الحمار هو سيشعر بالثقة والهدوء والتوازن النفسي. وبعدين يا جدو فيه حمير عندها أمراض جلدية لازم تتعالج وما يضرش لو جنبنا سلالات جديدة من حمير أجنبية قوية لتحسين السلالة.

لالا يا بني أنا مش معاك في دي ، يعني معاك في حق العلاج والرعاية لكن الزواج لا ، لازم نحافظ على سلالة الحمير بتاعتنا احنا يا بني مافيش مننا في العالم.

ما فيش مننا ؟ حضرتك أبهرتني يا جدو ؟ ازاي ؟ ؟ ؟

بص لي كويس يا بني وأنت تعرف تأمل في.

آه يا جدو شايفك

شايف إيه ؟

شايفك واقف في نفس المكان من ساعة ما فتحت عيني في الدنيا. لدرجة
يا جدو كنت باحسبك تمثال من تماثيل الفراعنة وبعدين لقيتك اتحركت
مرة فعرفت إنك مش تمثال بس اتحركت لورا، مشيت خطوتين لورا.
شفت يا بني ؟!! هو ده سر عظمتنا وسر عظمة البرسيم بتاعنا نقدر نمشي
بظهرنا ونقف لفترات طويلة تبهز العالم. واللي بيخالفنا بيحصله زي
ما حصل لعمي جلجل.

مين ده يا جدو وحصل له إيه ؟ ؟

آه دي حكاية قديسية أوي حاكمها لك بعدين.

(3)

-جدو الحقني ياجدو! حضرتك عارف إن سمعي سوبر، سمعت الحاج مسعد وهو في بيته بيكلم واحد صاحبه ويقولاه: الحمار جا والشيخ همام لازم نخلص منهم إحنا مش ناقصنا حمير في المجلس!!! شكلهم ياجدو حيقتلونا.

-ماتخافش ياجا، وبعدين مش قد السياسة ماتكملش!
-لا ياجدو أنا باطلب مشورتك بس وأنا مكمل الموضوع بس أنا اتفاجأت!
-رأيي أنك تروح للشيخ همام وتقول له يعلم لغة الحمير لعشر شباب يكون عندهم علم وأمانة ويقول لهم عشان لو هو مات يحلوا محله وكل واحد يعلم عشرة وبالطريقة دي المقاومة ماتقفش.

-إيه ياجدو العظمة دي؟؟ إيه الأفكار الجامدة دي؟؟! أنا حاموت من الانهار!

-أنا يابني لما سمعتك بتقول عايزين يقتلوك من الخضة عليك ومن الخوف عقلي اشتغل، أنا أصلا طول عمري ماجبش أشغله ومبسوط وراضي وحامد ربنا به كده. ورأيي يابني إنك تعتزل وتمشي جنب الحيط لا يحصللك زي ما حصل لعمي جملج.

-حصل له إيه ياجدو؟؟؟

-حاقولك بكرة يابني، أنا فكرت النهاردة فتعبت وحاسس بصداع ودوخة وعاليز أنا.

(4)

-مش حتحكيلي يا جدو حكاية عمك ججل ؟؟
-كان زيك كده يا بني ثوري ومش عاجبه حاجة في البلد، وقال إيه لازم
يقاوم الفساد وعمل جماعة اسمها رابطة أحرار الحمير، وكل واحد فاسد في
البلد يقطعوا عنه الميه والنور، والناس قالت البلد فيها جن بيعاقب
الفاستدين وكله بقى خايف، والبياعين بقو يوزنوا بالحق والأسعار رخصت،
لحد مافي يوم من الأيام شيخ الخفر شاف عمي ججل وهو يقطع سلك
كهربا بيته، كان الوقت متأخر أوي ساعتها وشيخ الخفر كان قاعد في
الضلمة برة بيته مش جايله نوم، فشافه، ففهم الموضوع ودبجه في ميدان
عام.

-طيب يا جدو هو عمك ججل ماخدش باله ليه ؟
-يومها يا بني اتخانق مع قرايبه وأصحابه والحناق يا بني والاختلاف بيحب
ال فشل.

-طيب يا جدو وجماعته كملت ولا لا ؟؟
لا يا بني قالو خلاص انكشفتنا فماتنفعش نكمل.
-بس المفروض يا جدو يغيرو الخطة ويكملو لأن الحرب سجل يوم لك ويوم
عليك!

-إيه يا بني الكلام ده جايبه منين ؟ ؟ !!!

-سمعته من المدرسة باقف جنب حيطة المدرسة وباسمع دروس التاريخ
ياجدو باحبها أوي.

-نهارك أبيض يا جحش ماتسمع لهمش تاني يا بني أنا خايف عليك. وبعدين
هم بيتعلمو عشان ياخدو ورقة كده ويعلقوها في بيتهم، أنت بتتعلم ليه؟؟
-عشان ياجدو العلم قوة.

-قوة إيه بس؟ شكلك رايح في سكة عمي جالجل يا جحش.

(5)

-مالك يا جا؟ شكلك زعلان؟؟؟

-نعم يا جدو البقرة ريري شافتني قالتلي كلام يسد النفس.

قالتهك إيه العبيطة دي كمان أم غل؟

قالتي مالك فرحان أوي كده ليه؟ كأنك بطل، أنت رحت ولاجيت

حمار ابن حمار.

-ما نزع لى يا جا لازم طالما حاتشتغل سياسي لازم تكون تنح من التناحة

وبارد وما عندكش دم يا إما بلاها سياسة، أنا يا بني باحب الهدوء

وَالسَّكِينَةَ وَأَنْتَ بِلْتَعْبَنِ.

إِزَايِ يَاجِدُو بَس أَنَا لَحْمٌ وَدَمٌ وَبَاحْسُ.

هو كده يا بني، طالما إحساسك عالي شوية سيب المجلس، أنت لسه

ماشفتش حاجة، ده أنت لو اعترضت بحق وحقيقي حتفصح بالكذب

وسنتك سودة أنت وعيلتك وحيعروك باللي عملته وما عملتوش

وحتنضرب.

-طيب يا جدو خلاص حاحاول أجهد لأنني فعلا عايز أطور من أحوال

الحمير، فلازم أصبر.

أنت حر يا بني. بس أنا ماجبش الأكشن، الأكشن ماليش فيه، فمش كل

شوية تغمني، شفلك حد بارد ماعندوش دم واحكي له مشاكلك زي مثلاً

کده ابن خالتي شکشک، ده لو الدنيا اتهدت حوالیه مابیتحرکش ولا

للأمام ولا للخلف كأنه عمود يابني، خد رأيه في كل حاجة، هو شكله
عبيط لكن عنده عقل يوزن بلد وعنده فكر، بس مبدأه في الدنيا: هات
لي البرسيم وافعل ما تريد.

-لا لا لا ياجدو عقل ايه ده؟؟ لا ده غبي، مش حضرتك ياجدو قلتلي

اللي مالوش خير في نفسه مالوش خير في حد؟؟

-ماهو يابني شايف أن مافيش فايده. وده عين العقل.

-لا ياجدو مع احترامي لحضرتك لا الكلام ده غلط.

إذا الشعب يوما أراد الحياة

فلا بد أن يستجيب القدر

ولا بد لليل أن ينجلي

ولا بد للقيد أن ينكسر

دخل يوسف ابن الحاج متولي وزعق لجا وقال له يالا ياجحوش على الغيط

ورانا شغل، قلبي بيقولي أنك بتفهم وذكي مش زي جدك العبيط ده.

وقلبي بيقولي إن بلدنا حتتصلح على إيدك يا حمار، نهق جا ورفع رأسه

عاليا، فقال له يوسف:

بس بلاش الثقة الزائدة دي عشان بتفكرني بنفسي زمان وفُتت منها بعلقة

أخذتها في القسم، آه ياجحوش أنا حاسس أنك فاهمني، ذات مرة اعترضت

وأنا في الكلية وعملت مظاهرة اتقبض علي وخذت علة في القسم ومن

ساعتها وأنا تبت وماشي جوة الحيط.

(6)

-الحقني ياجدو!!! مضايقتني في المجلس وعازين يطفشوني طالبين مني
ألبس بدلة وكرافتة!

-جميل ياجا عشان تبقى زيك زيه، إيه اللي مزعلك؟؟ كده حتبقي فيه
مساواة.

-بس أنا ياجدو ماجبش المظاهر أحب أكون على طبيعتي أحب وداني
وديلي ييقو ظاهرين ماجبش النفاق.

-لا يابني أنا مش معاك، لازم تستر نفسك وتبقى زي بقية الأعضاء، وأنت
بالطريقة دي ممكن تنتخب نفسك لمنصب رئيس المجلس.

-لا ياجدو مش للدرجادي أنا جنسي مختلف عنهم.

-والله يابني أهم شيء المخ والمفهومية.

-لا ياجدو من حيث المخ هم ماشفتش في غباءهم.

-طيب اتشطر كده وريني همتك عشان تبقى رئيس المجلس

-حاضر ياجدو هو الموضوع عايز شغل، لازم ألف على كل بيوت البلد

بيت بيت كل يوم واسمع بيقلو إيه ومحتاجين إيه ومين اللي يسرق البلد.
أهم حاجة المعلومات.

-بدل ماتتعب نفسك يابني روح بيت حمدين المخبر واسمع منه، عنده كل

الأخبار .

-ضحكتني ياجدو، حمدين المخبر ده أغبي واحد في البلد، مرة سمعته يقول للضابط معلومات كلها غباء في غباء، سمع مرة أدهم ابن الحاج فرج يصرخ كان عنده نوبة صرع بعيد عنك ويقول لاإله إلا الله الله أكبر الله أكبر، وأبوه فضل يقول لأمه خبي السلاح خبي السلاح، كان خايف لا يطخ نفسه من التعب، راح حمدين للضابط وقال له: أدهم ده في جماعة الجهاد.
-والضابط كتب وراه؟؟؟

-أيوه ياجدو أومال!!!! لازم يشتغل يعني يقعد فاضي؟!!!

(7)

-مالك يا جا زعلان ليه ومقهور؟؟ المفروض تبقى فرحان، رحت المجلس
النهاردة بالبدلة والكرافتة وآخر شياكة.
-بس ياجدو البقرة ريري قعدت تضحك لما شافتني وتتهز من كتر الضحك
وقالت: بطلو ده واسمعو ده الحمار لبس بدلة.
-مش قلتلك ولا تهتم يا بني بيها، أنت كده شكلك مش حتكمل في
السياسة.
-خلاص ياجدو حاجم حاجم حاجم أهو.
-جا!!!
-نعم ياجدو!
- شايف شكشك ابن خالتي جاي من هناك أهو، أول مرة يتحرك من
مكانه ده أكيد قام مالاقاش البرسيم بتاعه، فيه إيه؟ فيه إيه؟ طمني
يا شكشك، منعوا البرسيم من البلد؟؟؟
-حفيدك جا فضحنا يا حا، البلد كلها بتقول إن جا على علاقة مع البقرة
ريري!
-إيه؟
-زي مابقول لك كده؟؟
-وأنت صدقت؟؟
-طبعا صدقت، كل يوم بشوفها وهي بتضحكه!

-لا...ياشكشك دي بتضحك عليه، دي بقرة حقودة غبية مستفزة
-بس إحنا اتفضحنا في البلد
-لا ياشكشك أكيد حمدين المخبر طلع الإشاعة دي عشان جا رشح نفسه
لرئاسة المجلس ولسه يارايح كتر من الفضايح
-أنا رأيي إنه يرجع زي الأول، وينسي موضوع المجلس ده خالص كفاية اللي
أبوه عمله لما ماسمعش كلامك وهاجر لإيطاليا على لوح خشب.
-أول مرة أعرف ياجدو الموضوع ده، أنا باحسب أبويا واحد أجنبي اشتراه
وأخذه معاه إيطاليا.
-دي حكاية طويلة يا جا حاكها لك بعدين، أنا كنت مخبها عنك عشان
ماتطلعش زيه حمار عاق ماسمعش كلامي وكان متطلعا وعنده طموح
واتجوز حمارة إيطالية.

(8)

-باركلي ياجدو، الحمد لله، عسى أن تكرهوا شيئاً وهو خير لكم.
-خير ياجا

-ريري شافتي النهاردة حطت وشها في الأرض واتكسفت ومشت شكلها
صدقت الإشاعة بس الحمد لله ربنا كفاني أذاها
-الحمد لله ياجا

-وكان سمعت ناس في المجلس يقولوا إنهم يختاروني كرئيس للمجلس
لأن طالما أنا قدرت أخلي بقرة تحبني يبقى كده حاقدر أثر على الناس اللي
فوق.

-الحمد لله، بركة دعايا يابني

-ماتفرحش أوي ياجدو لسه فيه اتنين حرامية في المجلس سمعتهم يقولوا
لازم نقتله هو والمترجم الشيخ زفت. هم مايعرفوش أن سمعي سوبر.
-خلاص ياجا تبلغ الشباب اللي اتعلموا لغة الحمير إنهم يكتبوا على حيطان
البلد لو جا أو الشيخ همام اتقتلوا حانكتب فضايح أعضاء المجلس على
حيطان البلد، وبكده حيخافوا. ويكتبوا كلنا جا والشيخ همام.
-الله أكبر ياجدي الله أكبر لما الحمير تفكر وتحكم الدنيا حتتصلح.
-قول إن شاء الله ياجا.
-إن شاء الله ياجدو

(9)

-بارك لي يا جدي كسبت في الانتخابات بقيت رئيس مجلس الشعب،
ياسلام يا جدو لو سمعت خطبة الشيخ همام وهو يخطب على لساني،
ماهو يا جدي المتحدث الرسمي لي، وكل شباب القرية المتعلمين دلوقت
فهموا لغة الحمير بس ما بيتكلموش، هم بس بيهددوا بفضح أكاذيب الحرامية
لو قتلوني، المهم يا جدو الشيخ همام قال لهم في الخطبة:
الحمد لله رب العالمين الذي وفقني أنا أخوكم الحمار جا لتمثيلكم في مجلس
الشعب وسوف ترون بلدنا دولة عظي على يدي وبمساعتكم إن شاء
الله.

-ألف مبروك يا جا .

-بالمناسبة دي بقي يا جدو أنا قلت للشباب على نظريتي عشان يكتبوها
في الجرايد ويعلموها للناس.

-نظريتك؟!!!! قول يا جحوش يا بني

-بص يا جدو أهل القرية بقا لهم سنين طويلة ما بيتغيروش ما عندهومش
أمل وماسكين في كلمة واحدة أمر الله وقدر الله ومشية الله، وشكلهم
بالضبط شكل الحجارة القديمة مع أن الحجارة يا جدو بتتغير سبحانه الله.
مش عارف جبلتهم إيه دول؟

-إيه يا جا، كلامك ده يا بني كفر بقدر الله!!!!؟

-لا ياجدو ما قصدش، لازم يغيروا ويبقى عندهم عزيمة للتغيير ولو حصل
حاجة يقولوا قدر الله ويكملوا شغل ما يقفوش أبدا مش هو ده
الإسلام؟؟؟ لو القيامة قامت وفي إيدك شغل تكمله؟؟؟ ده الأجنب
ما عندهومش الجملة دي ما يعرفوهاش ولا يفهموها، لكن بمعتقدات أهل
بلدنا ده يبقى نموت أحسن.
-كده انت صح يا جا ربنا معاك يا بني يارب وترشح نفسك لرئاسة الجمهورية.
-لا ياجدو مش للدرجادي
-لا للدرجادي يا بني، طالما معاك الشباب المثقف الواعي ده تقدر يا بني.
الشباب اللي بيساعد بدون مقابل مش فارق معاه رئيسه بديل ولا بودان
طويلة أهم حاجة يكون قلوبهم على بعض وكلهم إيد واحدة ويكملوا بعض.

(10)

-مالك يا جا بتعيط ليه ؟ أول مرة أشوفك بتعيط ومنهار ؟
-جدو أنا مصدوم ، لما حضرتك قلت لي أشرح نفسي لرئاسة الجمهورية
قلت أتصنت على ناس أكثر في البلد عشان يبقى عندي معلومات
وأعرف الناس بتفكر ازاي ، اكتشفت يا جدو أن البلد دي فيها ناس
وس....

-بس بس بس عيب اللفظ ده مايطلعش من حفيدي ابن الأصول قول
ناس مش كويسة أو قدرة

-لا يا جدو أنا مش باشتم دي فعلا فيه ناس مش كويسة وناس قدرة
وناس وس... وناس بنت ستين و...

-بس ماتكملش ولو عايز تكمل ماتقعدش معايا في الزريبة
لاحول ولا قوة إلا بالله ، كده أنت ماتنفعش تبقى رئيس ، الرئيس لازم
يكون مؤدب ومايقولش ألفاظ.

-آسف يا جدو بس فوجئت بالناس حقد ونفاق وكره إيه ده وكذب
وتخطيط في الشر ، الناس مش بترج بعض ، أومال عايزين الحكومة ترجهم
إزاي ؟ ؟

-ماهو يابني بسبب الإعلام والتعليم والمسلسلات والشيوخ وحاجات
كثير

-بس يا جدو ماتفكرنيش بالشيوخ

-بترفس ليه تاني ؟؟ وبتشد في ودنك ليه ؟ لاتطول بعدين زيادة
-آه ياجدو سمعت شيخ بيعاكس واحدة في التليفون بكلام وحش أوي.
-إنا لله وإنا إليه راجعون دي مصيبة إيه دي ووجع دماغ إيه ده كنت
مرتاح طول عمري، فرحان بالبرسيم ومية المجاري ومش ناقصني حاجة
أستغفر الله العظيم يارب، ماتقعد يا بني وتسيب الهباب ده طالما أعصابك
رهيفة كده .

-لا ياجدو فكرتني بالميه مانا سمعت ناس ثقيلة أوي في البلد بيقولو كمان
سنتين مش حيكون فيه ميه وحنشرب البول .
-بول؟؟ الحمد لله وماله ؟ أحسن من وجع الدماغ بتاعك، مالبول ده يا بني
ميه برضه بس لونها أصفر.

-طيب ياجدو مش مشكلة اللون طيب حنعمل إيه في الريجة ؟
-سد مناخيرك يا غبي وأنت بتشرب!